



Ruta Tula

Ruta Tula organisá pa:
PLATAFORMA BERDAT HISTORIKO
den koperashon ku
Kas di Kultura Kòrsou



KONTENIDO

Plataforma Bèrdat Históriko	3
Kas di Kultura	4
Ruta di ekskurshon	5
Algun punto pa tene kuenta kuné durante ekskurshon	5
Libertat, Igualdat , Fraternidat Kousanan ku a kontribuí na e rebelion di 1795	6
Rebelion di 1795	8
Mapa: Moveshon di e rebeldenan durante e rebelion di 1795	11
Mapa: Kòrsou	12
Mapa di e diferente rebelionan den Karibe i Merka Sur	13
Liña di tempu: Komersio transatlántiko di afrikano sklabisá	14
Abolishon di sklabitut den kolonianan ulandes	16
Mapa: Ruta transatlantíkodi komersio di afrikano sklabisá	17
Gruponan di aktuashon	19
Gradisimentu	21
Tèst bo konosementu	22

RUTA DI EKSKURSHON

1. Salida for di Kas di Kultura rumbo pa Kenepa.
Promé parada na lanthùis Kenepa (Museo Tula): presentashon di gruponan.
2. Di dos parada na Santa Krus:
presentashon di gruponan.
3. Di tres parada na Ser''i Neger: presentashon di gruponan.
4. Di kuater parada , na ruina di lanthùis Porto Marie:
presentashon di gruponan.
5. Ta sali di Porto Marie rumbo pa Ref.
Di sinku parada na Ref: presentashon di gruponan.
6. Salida di Ref rumbo pa Kas di Kultura kaminda e ekskurshon ta terminá.

Algun punto pa tene kuenta kuné durante ekskurshon.

1. Tene bús limpi: hasi uzo di saku di sushi.
2. Pone selular riba "silent"
3. Ta prohibí pa kome i huma den bús.
4. Durante splikashon den bús, tene bos abou.
5. Sigui instrukshon pa ora di subi i baha for di bús i na paradanan kaminda tin presentashon.
6. Partisipantenan ta haña algu di kome i bebe na Kenepa i Porto Marie i na Ref tin oportunitat pa kumpra kuminda.
7. Tin tualèt na Kenepa, Santa Krus, Porto Marie i Ref: por fabor tene tualètnan limpi.

DANKI PA BO KOPERASHON.

Libertat, Igualdat, Fraternidat

6

Kousanan ku a kontribuí na e rebelion di 1795:

A. Anhelo pa libertat

E kousa prinsipal di e lantamentu di 1795 ta e anhelo persistente pa libertat ku tabata biba den kurason di tur esnan sklabisá, for di momentu ku a kue nan prezu na Afrika. Un anhelo asina profundo ku nan tabata dispuesto na duna nan bida p'e kousa di libertat.

B. Situashon ekonómiko malu:

For di 1730 e komersio hulandes di afrikano sklabisá ta bai drástikamente patras. Un di e motibunan ta ku Inglatera na 1713 ta haña e monopolio di rei di Spaña pa bende esnan sklabisá na e kolonianan spañó. Hulanda no por kompetí mas ku e inglesnan i fransesnan. Banda di esei na final di siglo 18 ta lanta krítika fuerte kontra e komersio di afrikano sklabisá. Pa Kòrsou e sla tambe tabata duru. Pasobra Kòrsou tabata floresé, dor di benta di afrikano sklavisá i merkansia di kontrabanda. For di año 1732 West Indische Compagnie, WIC, ku tabata doño di Antia, a duna komersiantenan privá, e derechi pa nan tambe por partisipá den e negoshi aki. Pa kolmo, Inglatera ta deklará Ulanda guera na 1780. E motibu prinsipal tabata, ku Ulanda ku su kontrabanda floresiente, entre otro di arma, a duna apoyo na e guera di liberashon di Merka for di Inglatera (1765 pa 1783). Esaki ta e di 4 guera entre Ulanda i Inglatera i ta resultá desastroso pa Ulanda. E guera akí ta nifiká final di WIC. WIC ta keda na 1784 ku un debe astronómiko. Na año 1791 tur debe di WIC ta pasa pa estado ulandes i gobernashon di e kolonianan, entre otro nos isla, tambe ta pasa den man di estado ulandes. Nos ta weta na kabamentu di siglo 18, ku hopi doño di plantashi ta bai bankarota òf tin hipotek pisá riba nan propiedat. Mas malu e situashon ekonómiko ta bira, mas e reglanan i leinan severo tabata oumentá, kontra esnan sklabisá. E kastigunan ta oumentá i e ransun ta bira ménos. E resistensha kontra doñonan tambe ta oumentá.



Bui di katibu

C. Liberashon di esnan sklabisá na Haiti:

Den mesun temporada na Haiti, esnan sklabisá, na 1791 ta inisiá un rebelion i ta logra kibra e kadena di sklabitut, a base di un lucha eksitoso bou di guia di Toussaint L'Ouverture i otro lidernan manera Dessalines. Indudablemente e idealnan di Revolushon Franses di 1789 a sirbi komo inspirashon pa e luchadónan haitiano. Dor ku diferente barku di Kòrsou ta hasi negoshi ku Haiti, ku personanan sklabisá di Kòrsou komo nabegante na bordo, nan ta bin haña sa di e notisia. Ademas tabatin famianan Franses ku ta hui ku nan katibunan bini Kòrsou. Nan ta plama e notisia di e viktoria di esnan sklabisá na Haiti.



Toussaint L'Ouverture

D. Revolushon Franses i okupashon di Ulanda

E grupo di blanku den sosiedat di Kòrsou, ku ideanan republikano, salí for di e filosofia di revolushon franses di 1789, tambe ta plama e ideanan nobo di 'liberté, égalité, fraternité' (libertat, igualdat i fraternidat) bou di esnan sklabisá i bou di esnan ku a bira hende liber, tantu loke nan tabata yama 'neger liber', i mulato liber. Pa kolmo Fransia ta invadí Ulanda den kuminsamentu di 1795. Na Kòrsou no ta klaro kiko gobernantenan mester hasi. Gruponan ta forma nan mes pro-Fransia òf kontra Fransia. Esnan sklabisá ku a tende di e revolushon liberal na Fransia tabata pensa ku gobernantenan nobo na Hulanda si ke duna nan libertat, pero ku ta e gobièrnu lokal ta ninga di anunsiá e lei.

Rebellion di 1795

Dia, 17 ougùstùs 1795, 40 a 50 persona sklabisá na plantashi Kenepa, ta laga e doño sa ku nan no ta traha p'e mas. Caspar van Uytrecht, e doño, ta bisa nan pa bai hiba nan reklamo serka gobernador den Fòrti. Nan ta liberá algun ruman sklabisá será den kouchi. Despues nan ta tumba pa plantashi Santa Krus. Algun di nan ta hiba mensahe na tur plantashi nan Banda Bou pa stimulá otronan pa nan tambe lanta kontra di nan shon. Esnan sklabisá for di plantashinan di rònt Banda Bou ta djòin e rebellion. Na Santa Krus e rebeldenan ta bebe awa di huramentu (trahá di ròm, kachu raspá i un puiru blanku) den un ritual pa seya nan union i determinashon den lucha.

Miéntras tantu, notisia di e rebellion ta yega Punda, ora e yu di Van Uytrecht, entregá un karta di su tata na gobernador de Veer.

E rebeldenan bou di mando di Tula i Bastian Carpata ta kue rumbo pa Porto Marie, dia 18 di ougùstùs. Louis Mercier, otro lider, ta bai plantashi Kenepa i ta logra konvensé esnan ku a keda, pa djòin nan.

Su meta ta pa konkistá e fòrtinan di Kenepa i Santa Krus, pa optené mas arma i pòlvo, loke e ta logra tambe. Un otro grupo bou di mando di Pedro Wacau, ta kue maestro ulandes Sabel presu, mar'é tras di un kabai lastr'é i despues ta mat'é.

E promé bataya a tuma lugá na e saliña di Rif St. Marie. Den e promé bataya aki a partisipá mas o ménos 300 rebelde. E rebeldenan a logra un viktoria kontra sòldánan di teniente Pleegeer den e saliña dilanti e plenchi di lanthùis Oud St. Marie (awendia e yama Hermanus). Despues di e derota akí Konseho Kolonial ta manda un ehérsito mas grandi bou di mando di kapitan Baron Van Westerholt. Van Westerholt a sali 19 di ougùstùs for di Punda bai Boka Samí i di einan e ta marcha ku su trupanan bai Oud St. Marie. Nan ta pasa nochi einan. Pastor Schinck ku a kompañá van Westerholt, ta bai papia ku e rebeldenan, pa purba konvensé nan pa nan entregá nan mes.

Un enkuentro históriko entre pader Schinck i Tula ta tuma lugá na Porto Marie. E pastor no por a konvensé e rebeldenan pa nan entregá nan mes. Tula a bisa Pastor



Schinck na final: “Nos no ke nada otro sino nos Libertat”. Pater Schinck a regresá man bashí serka Van Westerholt. Van Westerholt ta ofresé klemensia general. Rebeldenan ta bolbe rechasá i ta ripití nan eksigensha pa haña nan libertat. Miéntras ku Van Westerholt ta negoshá, e ta studia posishon di e rebeldenan pa forma su plan di atake. Den e konfrontashon ku ta sigui na Porto Marie, rebeldenan ta pèrdè i ta haña ta retirá. Nan ta djòin e grupo di mas o ménos 600 hende ku ya kaba a posishoná nan mes riba Ser'i Neger na Fontein.

Pa por kombatí e rebeldenan ku tabata okupá Serí'i Neger, gobièrnu ta manda èkstra trupa bou di mando di e mulato Jean Martin. Ademas ta dirigí barkunan di guera di marina ulandes, bou di mando di Wierts, tambe pa Banda Bou. Konseho Kolonial ta parti arma na tur ku ke bringa e rebeldenan.

Un grupo minoritario di poblashon liber, blanku, mulato i hende pretu, ta mantené nan prinsipionan republikano di libertat i igualdat i nan ta solidarísá ku e lucha di Tula. Un di nan, ta un señora blanku, Johanna Lesire, ku a skonde i protehá rebeldenan ku a hui, den su kasnan e.o. na Skarlo.

Despues ku Van Westerholt a kibra e resistensha na Porto Marie, dia 21 di ougùstùs, e ta marcha bai plantashi Fòntein. E ta tuma su tempu pa studia e situashon rònt di Ser'i Neger, pa wak ta kua ta e mihó lugá pa e ataká di nobo. Atrobe e ta trata di negoshá ku e rebeldenan, dor di ofresé klemensia, ku eksepsion pa e lidernan. E kontesta ta: "Nos ta aki pa vense òf muri."

Dia 25 di ougùstùs Van Westerholt ta ataká . Hopi rebelde ta pèrdè nan bida.

Hopi rebelde ku kai prezu ta ser ehekutá einan mes.

Esnan ku a logra hui, a agrupá nan mes den e mondinan di Kristòf i besindario i ta sigui hiba un lucha estilo di gueria: ataká i dispersé i despues bolbe ataká.

Van Westerholt a bai San Juan, i ta transformá e plantashi den su kuartel. E ta manda presu na bòshi fòrti, pa nan keda sentensiá. Van Westerholt ta kuminsá parti kantidat di karta di klemensia pa esnan ku bandoná fila di rebeldenan. E ta disidí di destruí tur maishi i otro kuminda den besindario di Ser'i Kristòf i ta laga venená tur pos di awa ku rebeldenan por usa. Meta di Van Westerholt ta pa debilitá e lucha ku e karta di klemensia, kreando divishon entre e luchadónan i tambe kousando hamber bou di rebeldenan. Konseho Kolonial ta anunsiá dia 27 di ougùstùs, ku kualke hende liber ku entregá Tula i e otro lidernan, lo haña un suma di plaka. Si ta trata di un persona sklabisá ku no a partisipá na e rebelion e ta haña su libertat. Un persona sklabisá ku a partisipá na e rebelion ta haña klemensia.

Mas o ménos rònt di 5 di Sèptèmber, Van Westerholt ta penetrá den Ser'i Kristòf. Atrobe hopi rebelde ta pèrdè nan bida. Van Westerholt ta instalá su propio tribunal, pa ehekutá rebelde ku nan haña ku arma.


Van Westerholt a duna òrdu pa kita pida orea di tur esnan ku ta ser konsiderá kómplise di e rebeldenan. Dia 8 di Sèptèmber tripulante di e barku di guera Medea ta kaptur á Luis Mercier den serkania di plantashi Kenepa. Dia 18 di sèptèmber dia un persona sklabisá di plantashi Kenepa, ta kapturá Tula. Dia 21 di sèptèmber Pedro Wacau i Bastiaan Carpata ta kai den un trampa. Personanan sklabisá di San Juan ta kue nan presu riba òrdu di nan vitó.

Rat kolonial a kondená 29 luchadó na morto i a laga ehekutá nan den Punda, esaki a sosodé di ougùstùs pa novèmber. E muhé luchadó Diana ta un di esnan ku nan a ehekutá den luna di sèptèmber. Nan a kap su mannan kita afó, pa despues strangul'é na un palu, pasó e la kue su doño Perret Gentil na garganta pa chok'é. Dia 3 di òktober a ehekutá e lidernan di e rebelion. A ehekutá Tula na un manera kruel: a habrak'é di pia te kabes, kima su kara i kap su kabes afó. Bastiaan Carpata mester presensia loka nan ta hasi ku Tula pa despues pasa den mesun kastigu. A lastra Pedro Wacao tras di kabai rònt di e lugá di ehekushon, despues ta kap su mannan kita afó i ta plèchè su kabes ku un mukel. Esaki pasó el a mata e maestro blanku, Sabel. Louis Mercier a haña kastigu di pal'i horka. E kurpanan nan a tira na laman na Ref. A pone kabes di Tula i Bastian riba un staka riba Ref.



Nòmber ofisial: “Monumentu Lucha pa Libertat”
Nel Simon a yama su kreashon: “Desenkadená”

MOVESHON DI E REBELDENAN DURANTE E REBELION DI 1795



SITIONAN MAS IMPORTANTE

- I Kenepa, kaminda e rebelion a kuminsá
- II Sta. Kruus: aki e ehérsito rebelde a haña forma
- III Porto Mari: sitio importante ku a konosé deliberashon i tambe e promé derotha
- IV Seru di Fonteín, sitio di e bataya decisivo
- V Seru Grandi: e posishon mas avansá di e rebeldenan.


RUTANAN PRINSIPAL

1. Tula ta bai Sta. Kruus
- 1a/b: katibunan di otro plantashi ta reuni ku Tula na Sta. Kruus
2. Mercier ta bai bèk i konkista fórtinan di Sta. Kruus i Kenepa
3. Tula ta bai Porto Mari ku e grupo grandi
4. Mercier ta bai Fonteín ku alredecor di 600 hòmber
5. Un vanguardia ta sali bai Seru Grandi
6. Katibunan di Hato ta bin djòin

--- kaminda di refugio

Diseño: Ch. do Rego
 Redibidun skatilo: Draw

XVI. Map of the uprising of Black Slaves. The uprising of the black slaves, dating back to XVII Century in Guadeloupe, Jamaica and Barbados, covered during the XVIII Century the whole of the Caribbean and this Caribbean Chronology registers during this century 59 important uprisings.



Liña di Tempu: Komersio transatlántiko di afrikano sklabisá

1502

E promé afrikanonan sklabisá a yega kontinente merikano.

1791:

Revolushon haitiano ta kuminsá den e kolonia yamá Saint Domingue, ku ta bira e nashon independiente Haiti den 1804. (Repúblika Haiti ta e di dos repúblika den nos kontinente (Promé ta Estados Unidos na 1776). Haiti of Ayiti den Creole ta e nòmber ku e indígenonan Taino-Arowak a duna e isla ku tabata nifiká “pais montañoso”).

1794

Konvenshon Nashonal Franses ta emansipá tur ku tabata sklabisá den nan kolonianan. Napoleon ta reanudá sklabilitut den 1802

1795:

◦ Na mei den region di Coro na Venezuela rebelion grandi di katibu bou di guia di Chirino.

◦ 17 di ougustus: Rebelion na Kòrsou enkabesá pa Tula.

◦ Lantamentu di esnan sklabisá na Jamaica entre yüli i desèmber. Den kuminsamentu nan a gana. Un total di 600 prizonero sklabisá ku a hui a wòrdu mandá Nova Scotia kaminda nan a muri di friu.

◦ Lantamentu den mesun aña na Demerara i Essequibo (Guyana); Cuba, Grenada.

1805: E konstitushon di Haiti ta bisa ku un persona sklabisá ku yega Haiti lo ta inmediatamente liber i un suidadano di e pais; akto revolushonario.

1807:

Parlamento Britániko ta prohibí komersio transatlántiko di afrikano sklabisá. Merka tambe ta pasa legislashon pa prohibí komersio di afrikano sklabisá, ku mester drenta na vigor na 1808.

1815:

Kongreso di Viena, Inglatera ta pone preshon riba Spaña, Portugal, Fransia i Hulanda pa nan tambe abolí komersio di afrikano sklabisá. Spaña i Portugal ta ser permití pa nan mantené e komersio un par di aña mas, teniendo kuenta ku ekonomia di suku den kolonianan di e paisnan akí (Cuba i Brazil).

1819:

Inglatera ta stashoná un eskwadron marítimo dilanti di kosta di Afrika oksidental pa patruyá kontra barkunan di komersio di katibu.

1833:

Inglatera ta pasa e akto di abolishon di sklabilitut den kolonianan ingles ku mester drenta na vigor ougùstùs 1834.

1848: abolishon di sklabilitut den tur kolonia di Dinamarca i di Fransia.

1851: abolishon di sklabilitut na Venezuela

1863: abolishon di sklabilitut den kolonianan ulandes

1865: Abolishon di sklabilitut na Estados Unidos (e aña akí tambe ta marka final di e guerra sivil na Merka ku a dura di 1863 pa 1865)

1886: Abolishon di sklabilitut na Cuba

1888: Abolishon di sklabilitut na Brazil

Abolishon di sklabilitut den kolonianan ulandes

Promé di yùli 1863 Ulanda a aboli sklabilitut den su kolonianan.
E doñonan di katibu a haña un kompensashon di f200,- pa kada persona sklabisá. Esnan sklabisá no a haña nada.

Nos antepasadonan despues ku nan a haña nan libertat no a skonde nan repudio pa e sistema inhumano di sklabilitut.
Nan a ekspresá esei hopi skèrpi den kantika:

Libertat, galité

Bo n'ta batimi ku chapara

*Libertat, galité
Ora Shon tin gan'i bati
Libertat, galité
Shon bai bati shon su mama*

I tambe den e kantika akí:

*Mi n'ta laba tayó
Awor ta djaka ta laba tayó
Ban (5x) mira shon su kara
Awor ta pushinan lo
Kohe raton pa shon
Awor katibu a kaba
n'tin katibu mas*

E dos kantikanan ta saká for di “Represhon di kultura. E lucha di tambú” di Mr. Dr. Rene Rosalia.

GRUPONAN DI AKTUASHON

GRUPO KARA

KARA ta para pa :
Kreando Artista Riba Antia

Meta di Kara:

Halsa nivel di teatro i di artistanan no solamente na Kòrsou, sino den henter Antia. Otro meta importante ta pa eduká nos poblashon.

Tipo di presentashon:

Kara ta hasi banda di teatro tambe poesia i baile. E grupo ta ensayá dos biaha pa siman i regularmente ta hasi presentashon komo parti integral di lekturanan. E grupo ta hasi presentashon tambe na okashon di fiestanan di pueblo, manera karnaval.

Direktor i presidente di KARA ta Giovanni Abath.

Pa kualke sugerensia, pregunta of informashon tuma kontakto ku Giovanni Abath
Telefon: 5627101

GRUPO D'ART

Grupo D'ART a keda fundá 9 di mei 2008 i ta un grupu di baile pa hóben for di 13 aña. D'ART ta na promé lugá un grupu di baile kompañá ku ekspreshonnan dramátiko hopi ekspresivo.

Meta:

1. Duna oportunitat na e hóben ku tin e talento di baile ,pa ekspresá esaki na un nivel mas profeshonal.
2. Logra lo máksimo riba tereno di baile aki na Kòrsou.
3. Pa den futuro konkistá merkado internashonal.

Na aña 2008 i 2009 D'ART a konkistá e premio di grupu di baile di aña na Kòrsou i e grupu ku mihó koreografia. Na yüli 2010 D'ART a forma parti di e delegashon ofishal di Kòrsou durante Festival de Caribe na Santiago, Cuba.

Direktor : Raychel Sambo .Juan Hatoweg 202. Telefon: 520 3555
Lider : Ivan felipa

GRUPO ANAKU KUUMBA

Splikashon di nòmber:

“Anakú” ta nifiká : un simia ku ta spreit.

Un simia ku ta spreit tin potenshal grandi. Pesei mes e por pusha, dependé kua tipo di mata, tur loke tin den su kaminda pa e por plama, ankra bon den tera i krese.

“Kuumba” ,un palabra di origen afrikano, mará na nos rais afrikano, ta nifiká kreatividat. Bo tin ku akumulá semper mas tantu kos bon i kreativo posibel, agregá kreatividat di nos antepasadonan, pa ora bo bai ,laga un herensha mas riku posibel pa e generashon nobo.

Meta:

- 1.Sera nos pueblo konosí ku obranan di nos outornan ku ts skirbi i kanta na papiamentu.
- 2.Krea outornan konsiente i ku amor pa nos kultura.
- 3.Stimulá hóbennan pa nan tambe deklamá i skirbi na papiamentu.
Banda di skirbi i deklamá, hasi uso di otro forman pa ekspresá manera kanto, baile i drama pa kompletá traspaso di nos kultura.

Presidente i direktor artístiko ta Noris Doran

Pa mas informashon por tuma kontakto ku Noris Doran .

Telefòn/Faks 465-5051 Sel.: 5698316

TOKADO DI BARI

Sr. Raymond Justiana Ompi Tio

GRADISIMENTU

Plataforma Bèrdat Históriko i Kas di Kultura ta gradisí pa nan koperashon duná na Ruta Tula :

- Señor Norman Girigorie di Fontein
- Doñonan di Plantashi Porto Marie
- Tur kontribuyente ku ta preferá di keda anónimo

Un gradisimentu hopi speshal ta bai pa:

-tur kolaboradó ku ta kontribuí na Ruta Tula komo guiadó, kontadó di kuenta òf hasiendo trabou organisatorio

-Grupo KARA; Anakú Kuumba;

D'Art ;Tokadónan di Barí ; Artistanan invitá, ku ta pone historia biba ku nan arte.

Tèst bo konosementu

1. Rònt di ki tempu europeonan a kuminsá ku e komersio di afrikano sklabisá?
 - for di 1500
 - for di 1600
 - for di 1700

2. Kuantu afrikano mas o ménos e europeonan a transportá durante e komersio transatlántiko?
 - 1 mion
 - 5 mion
 - 12 mion

3. Te ainda falta mas inbestigashon pa sa e sifra mas eksakto di e kantidat di afrikano ku hulandesnan a hasi katibu. Nos ta usa te ainda e sifra di:
 - 200.000
 - 550.000
 - 1 mion

4. Kon yama e kompania ku ta buska e Afrikanonan presu for di Afrika?
 - VOC
 - WIC
 - CWO

5. Na unda tabata warda e afrikanonan presu ora nan yega Kòrsou?
 - Tur afrikano presu ta bai Zuurzak
 - Tur afrikano presu ta bai Asiento
 - Entre otro den Fòrti, i mas plantashi di gobièrnu.

6. Tula a haña tambe e nòmber di Rigaud pasó:
 - e ta nòmber di un general haltu den e lucha di Haiti
 - e ta un nòmber di revolushon Franses
 - Tula probablemente tabata un Haitiano

7. Otro kabesantenan den e rebelion di 1795 tabata:
 - Bastian Carpata i Miguel Boelbaai
 - Pedro Wacau i Steba
 - Bastiaan Carpata, Pedro Wacau i Luis Mercier

8. 3 di òktober tambe ta un día konmemorábel den e lucha di 17 ougùstùs, pasó:
 - e dia ei a mata e lidernan mas importante kruelmente
 - ta e dia ei a haña Tula i e otro lidernan i a kue nan presu
 - e dia ei e lucha a yega na su final.

9. E motibu prinsipal pa e lucha di 1795 tabata:
 - Pasó e doñonan tabata ekonomisá hasta riba e tiki kuminda ku esnan sklavisá mester a haña.
 - pasó e kastigunan a oumentá
 - Pasó na promé lugá esnan sklabisá ta tin un hansha pa libertat

10. E promé bataya di e lucha di 1795 a tuma lugá na:
 Rif Oud St Marie
 Porto Marie
 Ser'i Neger
11. E militar mas importante ku a haña òrdu di gobièrnu pa kibra e rebelion yama:
 Pleeger
 Marcus Anthony
 Van Westerholt
12. Kua hende muhé a ser ehekutá na 1795?
 Sablica
 Diana
 Martha
13. E lugá di enkuentro pa tur esnan ku a lanta den e rebelion tabata:
 Santa Cruz
 Kenepa
 saliña dilanti di Lanthùis Oud St Marie
14. Tabata distinguí esnan sklabisá den:
 Katibu di kas, di kunuku, di fishi
 Katibu, vitó, bomba i katibu di kunuku
 Katibu di plantashi i di suidat
15. Un maroon, shimaron, ta:
 un persona sklabisá ku a hui
 un palabra ku ta nifiká resistensha
 Un tipo di vitó
16. Kòrsou a konosé banda di e rebelion grandi di 1795 dos otro rebelion, na Rif. St. Marie i na Hato. E rebelión na Hato a tuma lugá na aña:
 1747
 1750
 1799
17. E premio ku gobièrnu a stipulá pa kapturá e lidernan tabata:
 libertat pa un persona sklabisá ku no a partisipá na e rebelion
 25 Johannes pa un hende liber, libertat pa un persona sklabisá ku no a partisipá na e rebelion, klemensia pa un persona sklabisá partísipe den e rebelion
 25 Johannes pa un persona liber, klemensia pa un persona partísipe den e rebelion.
18. Na momentu di abolishon di sklabitut:
 6751 persona sklabisá ta haña nan libertat na Kòrsou
 12.500 persona sklabisá ta haña nan libertat na Kòrsou
 20.000 persona sklabisá ta haña nan libertat na Kòrsou

19. E monumento na Ref di Tula yama:

- 0 Desenkadená
- 0 Tula i kompatriotanan
- 0 monumentu 17 ougùstes

20. Hulanda a abolí sklabilitut na aña:

- 0 1763
- 0 1863
- 0 1888

Kontestanan:

- 1-for di 1500
2. mas o menos 12 mion
3. mas o menos 550.000
4. WIC
5. entre otro Fòrti i mas plantashi di gobièrnu
6. nòmber di un general haltu den e lucha pa libertat na Haiti
7. Bastian Carpata, Pedro Wacau i Luis Mercier
8. e dia ei a mata e lidernan mas importante kruelmente
9. Pasó na promé lugá esnan sklabisá ta tin un hansha pa libertat
10. Rif Oud St. Marie
11. Van Westerholt
12. Diana
13. Santa Cruz
14. Katibu di kas, di kunuku, di fishi
15. un persona sklabisá ku a hui
16. 1750
17. 25 Johannes pa un hende liber, libertat pa un persona sklabisá ku no a partispá na e rebelion, klemensia pa un persona sklabisá partísipe den e rebelion
18. 6751 persona sklabisá ta haña nan libertat na Kòrsou
19. Desenkadená
20. 1863